



DEO OPTIMO MAX.

UNI ET TRINO,

VIRGINI DEI - PARÆ, ET S. LUCÆ
Orthodoxorum Medicorum Patrono.

QUÆSTIO MEDICA,

QUOD LIBETARIIS DISPUTATIONIBUS,
*manè discutienda, in Scholis Medicorum, die Jovis secundo mensis
Januarii, anno Domini M. DCC. XLIX.*

M. PETRO BERCHER, Scholarum Professore,
Doctore Medico, Præside.

An ab uteri, ejusque vasorum perpendiculari situ, menstrua Mulierum Purgatio?

I.



ARIAS corporis humani partium, formas, situs, textu-
ras contemplare, earum pro variis suis muneribus, pro va-
riâ indole, artificiosissimam fabricam, singularem figuram;
connexionem, actionem, & usus, mirari nunquam defines;
adeò variè, adeò appositè, adeò utiliter ad flammam vita-
lem; intrâ machinæ nostræ claustra retinendam, construun-
tur omnes. Sed in utero præsertim stupendum certè multiplex artificium
deprehendes; hunc enim operi cui destinatus erat, tanto apparatu, accingi op-
portuit. Porro præter primariam illam, & quasi triplicem quæ ipsi incum-

A

bit provinciam, foetum concipiendi, concludendi, fovendi, altera etiam, quam secundariam rectè dicere possis, obtigit, statis nimirum temporibus certam cruoris copiam foras ejiciendi: quam autem periodicam, menstruam ut plurimum evacuationem, tanquam sanitatis tutamen acceperunt mulieres, hanc siquidem superflui potius quam immutati humores eliminantur; hinc purgatio nuncupatur, cui varia nomina & apud Vulgum & apud Magnates concessa fuere, quæ, vel ut omnibus nota, vel ut parvi momenti de industriâ omittimus; diversis adhuc nominibus ab Autoribus Latinis & Græcis promiscuè insignitur fluxus ille; quocumque nomine eum designare velis, hujus laticis scaturiginem in utero quæras. Is quasi victima singulo mense mactatur, hinc, scilicet ex utero, superfluus, sincerusque periodicè amandatur cruor, mactatæ recenter victimæ sanguini, aut ei qui pertusâ cubiti venâ exit, planè simillimus, nisi fortè aut diuturniori morâ, aut deterioris succi miscelâ vitium contraxerit, undè appareret, cur apud Plinium, & veteres plerosque criminum arcessatur menstruus sanguis, cur eis si fides sit, veneni dotes quandoque æmulatus fuerit, cur eum excrementitium nonnulli putarunt. Cum Heurnio * tutius asseverari potest ex essentia perversum non esse sanguinem illum, neque conviciis afficiendum esse naturæ opus, quod mulieribus sanitatem, parentibus liberos pollicetur; prava enim qualitas, si quandoque apparuit, à perversâ totius sanguinæ molis constitutione, sive scorbutico, sive scorbutico, sive syphilitico vitio inquinatæ repetenda est: uno verbo, si quædam hujus cruoris malignitatem comprobant experimenta, iis si certa supponantur, alia possunt objici, quibus huic malignitatem deesse evincitur; ex iis unum, quia ignotum est, colligo. Chirurgus Parisiensis **, cui fides tutò potest adhiberi, cum mulierem quamdam foetidum odorem, quoties hanc colluvie madesceret, ut quibusdam contingit, corpore & ore effundentem cognosceret, linteis statim è pudendis ablatis, & sanguine menstruo adhuc calido madefactis, lagenam vitream optimo vino repletam, per plures dies obvolvitur, nec ullo modo alteratum fuit vinum illud; si tamen malignitate quâdam præditus fuisset cruor, in vino certè, quod ad experimentum adhibitum fuit, hæc apparere debuisset. Peculiarem hanc evacuationem præcedit, & proximam prænuntiat insignis quæ in muliebri sexu, circa pubertatis annos contingere solet mutatio: tunc enim pubes erumpit, attollitur in geminum nec indecorum tumorem pectus, fororiant mammæ, sanguis vix suis receptaculis coercitus, quocumque diffunditur, insolito fulgore micant oculi, spargitur ore purpureo vividus lepor, puellam denique jugali jam thoro habilem prodit irrepens furtim in vultu, in gestu, in incessu ipso, in toto denique corporis habitu venustas; verum hæc subitanea quæ exteriùs corpori tunc accidit mutatio, eadem intùs in utero fit. Uterus in hypogastrio vesicam inter & intestinum rectum ad divaricationem usque ossium pubis protenditur. Inversi pyri figuram æmulatur, & à fundo latiori, in satis exiguum collum definit. Deprehenditur esse firmissimæ, densissimæque texturæ, quam efficiunt arteriæ & venæ, in ramos numero propemodum infinitos dispertitæ, nervi, & membranæ cujusdam tendinosæ filamenta; ex his, scilicet uterinis vasis quasi ex totidem fonticulis emanat purpureus ille latex, ingens disputandi argumentum. Aliis citiùs, aliis tardiùs incipit illud effluvium, nec certiores in desinendo servat leges. De his nihil

* Joan. Heurn. tom. 3. de morb. mulier. cap. 1.

** Baccalaurei proponentis Pater.

audeas decernere. Illius copia, pro temperamento, ætate, victu, regione variatur. Uberius illæ purgantur, quæ graciliores & sanguineæ, fuscæ, quæ regiones frigidissimas colunt. In biliosis paulò maturius erumpit. celeriusque periodos suas conficit; fœminis gulæ deditis, ad sextum sæpè diem extenditur, tenui verò victu, aut exercitio multo utentibus, citius absolvitur. In junioribus puellis, quòd sanguis multus in corporis nutrimentum cedat, sæpè longius fit periodi intervallum; ad debitum ubi pervenerit incrementum mulier, frequentior redit periodus. Si senescat, ab exsiccato tunc corpore, diuturnior indè periodi mora; in ætate provectiori, cujus terminos frustra indigites, excretio illa prorsus cessat, atque evanescit: suas vulgò inchoant periodos catamenia, circà secundum septenarium, & circà sextum, septimumve definunt. Quædam tres, aliæ quatuor, aliæ sex, sæpius verò tres dies, hâc colluvie madent fœminæ; quibusdam circà vigesimum, aliis circà vigesimum-septimum, aliis bis, aliis semel, aliis denique sæpius in mense redit hæc evacuatio. Cujus quantitas in adultis sanis, & robustis, uncias viginti adæquat: hoc pro primâ vice, instante fluxu, innumera symptomatum genera irruunt, eodem cessante subsequuntur morbi, nec pauci, nec curatû faciles; his duobus in extremis cruciantur mulieres; in imminentibus menstruis pati ediscunt, nec absque periculo, menstruari obliviscuntur, hinc adagium illud. Undè gaudent fœminæ, indè tristantur, undè tristantur, indè gaudent: experiuntur reverà puellæ, uterum tortoris nonnunquam agere vices, & hîc undè vitam sumunt, mortis nebulas, sæpius exhalari. In tenellis virginibus, quæ menstruum effluxum nondum perpessæ fuerunt, hunc innumera præfagiunt indicia; nihil non afflictum, nihil non debile, nihil in corpore ferè sanum.

I I.

EX quo dogmatica incæpit vigere Medicina, mirum quantùm ingenia Medicorum exercuerit, ne dicam torserit, indagandâ hujus fluxûs periodici, notatu sanè dignissima ratio. In hujus inquirendis phænomenis, quot & quàm celebres incassum sudarunt viri? Horum causæ latent adhuc, latebuntque diù; catameniorum alternantes reditus Lunæ tribuunt plures, undè vulgare illud effatum.

Luna vetus veteres, juvenes nova Luna repurgat.

Menstruum sanguinem archæi, vel fermenti cujusdam auxilio separari asserunt nonnulli, alii (a) purgationem hanc arcano & admirabili quodam naturæ beneficio, aut divinâ providentiâ ad futuram generationem perfici credunt, dum scilicet post menstruorum effluvium expurgato sordibus utero, conceptio facilius evadit, puriorque ad ovum allabatur sanguis. Quidam hanc evacuationem in canibus, ut in mulieribus ad nutritionem fœtûs, quando supprimitur, inservire antumant; fuerunt qui non multùm absimiles iis, qui functiones qualitatibus occultis subjiciunt, & explicant, *menstruificam* adscribere facultatem, inter antiquos nonnulli per vasorum extrema, cotyledones dicta, & periodicè rupta, cruorem excidere asserunt. Multi, & recentiores ferè omnes, catameniorum eruptionis causam, sanguinis exuperantiæ referunt; eam sumit Bergerus, (b) à justâ, solidi liquidique, ex quibus coaluere mulierum corpora, porportione, cur autem per muliebria fluant, à singulari vasorum constructione repetit;

(a) Ballonius

(b) Jos. Gothof. de Berg. Phys. Med. c. 20.

Hanc evacuationem ideò fieri vulgò dicitur, quòd turgescant, & depleantur per vices uteri vasa, singulisque mensibus plethoram quamdam, alternis concipiant ac deponant; sicque pro generali istius fluxûs causâ, sanguinis

redundantiam afferunt. Verum quidem est plethoræ in mulieribus, & sanguinis in utero regurgitationi favere; humidius earum temperamentum, laxiora partium stamina, rariorem, mollioremque carnem, cutis minùs patentem poros, vitam desidem, liberaliorem cibi euchyismi usum, vasa denique uterina præ cæteris omnibus dilatari ac distendi docilia, proindèque infarctui quàm maximè opportuna. Hæc ab iis quæ vulgò occurrunt experimentis astruitur opinio, observatur enim, inter mulieres, eas quæ maximè sanguinæ sunt, mensibus maximè abundare, aulicasque pinguedine, & otio diffuentes largo hujus evacuationis profluvio mancipari; dùm rusticæ, parvo viventes, & duris exercitiæ laboribus, nullatenùs aut eam vix norunt purgationem, quia nempe his exercitiis, & vivendi ratione, fibræ indurantur, firmantur muscoli, cutis elaterium augetur, & ex illius spiraculis, expuitur humor superfluous, alioquin in facili extensilem uteri substantiam decubiturus: at cur sanguis illè rarè per alia, plerumque per uterina erumpat vasa, quæris? Uterum & omnia generationis organa perscrutare, major est aortæ descendens trunci diameter, innumeris arteriis, & venis, non carne musculosâ, non adipe, ut in cæteris ferè quibuscumque corporis partibus intertextis, aut suffultis, nec ullâ distinctis valvulâ, sed inter se variè implicatis, & intortis constat uterus; curvis ductibus, uterum præreptant hæc vasa, & crescente utero faciliè extendi valent: qui igitur in vasis totius corporis redundat cruor, flexuosas uteri venas perlabitur, nimîâ copiâ ipsas paulatim distendit, ac tandem magis ac magis intumescens, ultrâ metam distensas rumpit, sicque è venarum, & arteriarum osculis, stillans dimanat cruor. Nec satis est semel uterum hâc sarcinâ liberari, recurrit identidem statò tempore hæc vasorum ingurgitatio, quod in fœminis sanis, ad unius ferè mensis curriculum extendi animadvertitur, quòd cæteræ evacuationes, per unius mensis spatium, assumptorum quantitati non respondeant, corporis enim muliebris pondus, unâ ad alteram, menstruâ purgatione sensim crescit, artuum namque & totius corporis gravitas, quam instante periodicâ evacuatione percipiunt mulieres, virium restitutio, actionum alacritas, quas eâdem cessante experiuntur, & varia quæ prætermittimus experimenta pondus hoc detegunt. Sic autem sanguinis, humorumque periodica fit redundantia, hoc quo turgebant, vasa, sanguine elapso, flaccida iterum evadunt, suprâ se invicem coïncidunt, sponte suâ occluduntur eorum oscula, cessat uteri fluxus, donec altero mense redeat succorum coacervatio, quâ ab affluente solito copiosius sanguine, intumescens uterus gravetur, & factâ in dies novi humoris accessione, expedire se molesto pondere cogatur, tum viam sibi quærit impatiens sanguis, dirumpuntur arteriolarum extrema, & quâ datâ portâ stillat.

III

INTER eos, qui de Catameniis scripsere, altiùs differuit Joh. Freind. (a) in utero nihil præter arteriarum & venarum ramos, ex utroque latere sibi invicem per anastomosim commissos, non recto cursu delatos, variè inter se implicatos, curvos, & serpentino cursu perreptantes inspexit, hâc uteri structurâ, & respectu horizontis perpendiculari situ innixus, vim quâ aperiuntur vasa undè fluere debent Catamenia, æstimat & desumit, à sanguinis mole, & canalium perpendiculari situ; à pressione perpendiculari, ab ictûs vi, & à resistentiâ, quam eò minorem supponit, quòd vasa rectiora, majorem verò quòd magis in vasorum curvaturas ad angulorum incidentiæ sinus accidit: fundamenta hypothesis Joh. Freindi dilata, & contrita fuere, à *Peroneo* quodam Medico, qui duo tantùm, ad Catamenio-

(a) Emmen.

rum fluxum promovendum admittit. Amplitudinem scilicet Aortæ descendens, & arduum sanguinis ab utero regressum, qui pondere suo facile accedit, & indè ob valvularum in venis defectum, per flexuosa ductuum volumina, ad superas remeare partes, haud facile potest; causam hujus evacuationis ab arteriarum uteri parietum lymphaticarum plethorâ simplice distentarum petit. Celeberrimus in Acad. Monspel. Professor, (b) eodem circiter tempore, quo edita fuit Freindi emmenologia, de morbis mulierum agens, ab hujus opinione discedens, ideò periodicè fluere Catamenia contendebat, quia lactei tubuli congesto uteri lacte turgescunt, venasque circumrepentes ita comprimunt, ut collaterales seu conici ductus, qui venis citrà compressionem appenduntur, irruentis sanguinis impetu, cogantur dehiscere in cavum uteri, sicque sanguinem guttatim effundant.

(b) M. Fizes.

I V.

C E L E B E R R I M I nostri Doctoris Angli, ingeniosum sanè est inventum, sed suis etiam scatet difficultatibus.

1^o Non à sanguinis mole repetenda est hæc evacuatio; alioquin post pastum vasa rumpi & fluere deberent Catamenia, si quidem tunc augetur sanguinis moles; ictus vis in vasorum angulos, nec horum canalium innumerabiles gyri adhuc effluxum conferunt; nam in viris, aliisque animalibus, juxtà eundem auctorem, non menstruatis hi reperiuntur vasorum inflexus.

Deindè verò, eò minori velocitate certè donatur sanguis, quò per numerosiora vasa fluendo, numerosiores resistentias superare cogitur; hoc cernere est in glandulis, in quibus, unanimi ferè Medicorum consensu, maximè retardatur sanguinis velocitas, à cujus imminutione & crudelissimæ illæ, quibus obnoxia sunt obstructions, & adeò variæ indolis succorum à fonte primario secretiones explicantur. Nedum igitur sanguinis velocitas, illis vasorum circonvolutionibus augeatur, imò plurimùm obtunditur, & ad minimum sensim reducitur sanguinis motus; quò enim pluribus obicibus occurrit, fluidum vel aliud quodcumque corpus motum, eò plus sui motus deperdet. Porro vasorum fluxus & gyri permeandi, totidem sunt obices, quibus potius retardatur quàm acceleratur sanguinis motus; ergò vis ejus minor, hinc etiam omnes ferè uterini morbi ab obstructionibus oriuntur, quia pars illa, glandulæ simplicis instar, ex propagine vasorum omnis generis, in glomeres arctè secum invicem involutorum conflatur. Nihil facit vasorum perpendicularis situs, undè ictus vim majorem concludit. Nam supponamus vas aliquod incurvatum cum decem angulis rectis & columnam fluidi tranantis, cum decem motus gradibus directè impingere in latus oppositum primi anguli; nonne totam vim quam à perpendiculari cursu obtinet, isti communicabit lateri in primo angulo? Ergò cum solâ vi horizontali in cæteros angulos impinget, aut cum vi sanguinis à tergo pellentis; ergò lapsu perpendiculari exorta vis in primis angulis, deperditur, nec eos transit, & consequenter nullatenus in ultimis angulis, multò minùs ultrà, scilicet in vasorum extremis, in quibus fit eruptio sanguinis, sentitur. Ergò ad rupturam vasorum, nil facit, situs aortæ perpendicularis, alioquin primi, vel ad summum secundi anguli apices, in quibus vis illa maxima est, non autem extrema vasorum capillamenta disrumparentur, quod rationi & experientiæ contrarium est. Dicant etiam qui tanti faciunt petitum ex perpendiculò argumentum, quâ ratione fieri possit, ut diuturniori morbo decumbentibus mulieribus, vel aliâ quâcumque causâ ad præscriptum tempus non recurrant menstrua, quare in viris, quotquot ni-

miâ sanguinis copiâ turgentes deprehenduntur, periodica non contingat per hemorrhoidum vasa, excretio? At inquiunt, suffulciuntur hæc vasa & crassâ ac musculosâ intestini recti tunicâ, deffenduntur; esto, diffiliunt tamen in quibusdam; quid? Si ad pulmonum vasa respicias, multiplici plexu circâ bronchiales vesiculas perreptantia, omnique prorsus fulcimine destituta? Quid si ad cerebri arteriolas, in mille gyros abeuntes, suprâ fidem tenuissimas, neque tamen facillè disrumpendas? Vetat nimirum peculiaris quædam utriusque visceris fabrica, quâ expediendo ac promovendo sanguinis circulo cautum est. Nullis illic repagulis coercitus humor intrâ vasa congeritur, neque quod superfluit, per hæc loca amoliri satagit Natura. Restat igitur argumentum quo contendit Dominus Freind., momentum sanguinis augeri, quia in plethorâ augetur quantitas imò & velocitas ejus; quod sanè falsum est, nam eâdem ratione quâ crescit quantitas, eâdem decrescit velocitas sanguinis, alioquin cordis & arteriarum vis contractoria à quâ sanguinis velocitas, majorem impertiri posset velocitatem, quod supponi nequit, si quidem non in infinitum crescit vis cordis, & quò magis distenduntur cordis & vasorum parietes, eò difficilius, & minori vi sanguinem pellent, ità ut non nisi intrâ certos limites eorum vigeat vis, & insuper minuitur velocitatis momentum, cum sanguis in mollia & parùm elastica vasa irruit. Neque est quòd dicat augeri velocitatem, quia in plethorâ major secernitur spirituum animalium copia, undè fortior, & frequentior cordis contractio; norunt omnes eundem produci effectum quoties resistantia eâdem ratione crescit, ac ipsa vis motrix, ut in casu præsentis moles sanguinis pellenda, eâdem ratione crescit, quâ secernuntur spiritus animales.

V.

VIS igitur quid clarius, nec repulsam patieris: talem sanguinis evacuationem in Simiis observatam unâ voce agnoscunt Medici, quod ex perpendiculari corporis situ præsertim, nec non & ejusdem partium genitalium conformatione deducunt, sed uno pariter ore aliorum brutorum femellas, fluxum menstruum non experiri asserunt. Hallerus pro causâ affert, duriora esse in iis uteri vasa, neque ità dilatabilia, ut arteriosum sanguinem recipiant, contendit que id demonstrari autopsiâ genitalium mulieris cum musculofo, & fibroso femellæ brutorum utero sinubus carente, atque etiam ex cotyledonum indole, quæ lacteo succo absque sanguine turgent. Quibus certis animantibus tales evacuationes interdum contigisse haud dubium est, parvi facio observata, ut pote rariora, à quibus proindè, nihil jure aut meritò in scientiis concludi potest; sic Felix Platerus menstrua observari in cane fœminâ testatur. Menstruam purgationem, in equabus, scrovis & ovibus se aliquando notasse scribit Christian. Franc. Paullini, & ibidem refert Alexander de insulâ se habuisse Picam fœminam singulis mensibus in novilunio, ad 2 vel 3 dies, per inferiora, sanguinem, suo more, sat copiosè excernentem, cæterà optimè sanam, quod cibus, initio adscripsit, quid igitur, num in Raiâ pisce ordinarium fluxum menstruum observavit Joh. Ott. Helbigius, quod & in caniculâ parvâ quam domi habuit Scurgirus, deprehendit.

Nec ad talia confugiendum est, ut constet, non solum mulieribus, menstrua contingere, sed etiam in brutis femellis, analogum quid observari, id est, statis temporibus, menstruantium fœminarum more, sanguinem, vel quid ipsi simile è pudendis effluere; ità certè mulieribus & Simiis non ità

propriam esse hanc evacuationem, quin & viris, & animalibus non solum quibusdam, sed & cuidam animalis speciei accidat, observanti constabit; nec mirum, natura enim simplex, & sibi uniformis, ubi sunt functiones eadem, iisdem machinis, & instrumentis utitur, & vice versâ, ubi eadem sunt machinæ, eadem instrumenta, ibi easdem esse naturæ functiones rectè concludas; porro quod ars Anatomica & Phisica in partibus mulierum genitalibus detegit, detegit idem in belluis fæminis, vel saltem in canibus, nec certè putandum est hæc temerè & fortuitò, à naturâ ut utilium prodigâ, sic inutilium parcâ efformata fuisse; si igitur eadem in partibus canum femellarum genitalibus ac in mulieribus reperitur structura; eadem etiam actio, idem usus, in iis facilè demonstrari potest.

Concipere, gestare, parere, tria sunt brutis femellis ac mulieribus, ut omnibus notum est, communia; iis, conceptus æque facilis, gestatio æque operosa, partus dolorum & alæ æque plenus, eodem modo conceptus, à conceptione ad partum usque, eadem via est: quid igitur? non ne uterus, in femellis omnibus, excipiendo, concipiendo femini? Nonne ovulum fœcundatum ex ovario, & tubâ fallopianâ recipiendo dicatur? In eo ut apud mulierem, fœtus per statutum tempus continetur. In eo nutrimentum, accrementum maturitatemque adipiscitur, donec tandem perfectus, vi uteri musculosâ, per vaginam expellatur; non minùs immensam vasorum segetem sibi vindicat uterus caninus, quàm muliebris, horum eadem planè conformatio, idem decursus, nam præter quatuor insignes quos affectat sibi arteriarum rivos uterus caninus, ut muliebris, alias etiam vasorum propagines è viscerum viciniâ mutuatur, hæc vasa non recto tramite uterum ingrediuntur, non sunt in longum protensa, sed innumeris sibi invicem concorta modis, totam uteri substantiam, serpentino gressu, ut apud mulieres perreptant. Venarum alvei suis orbantur etiam valvulis, difficilis hinc liquorum reditus propter viam gyris & anfractibus asperam; ea tantùm deprehenditur differentia scilicet pudendi muliebris situs, respectu horizontis, perpendicularis est, idem etiam est situs arterialis fistulæ quæ à corde ad uterum sanguinem deportat, dum pudendi canini situs, respectu horizontis parallelus est, consequenter etiam vasorum quæ ad uterum pertinent, sed quid indè? An sibi semper similem, & in agendo certis, atque constantibus alligatam legibus naturam ab ipsis injustè recedere conjicere licet. Dum præsertim experienciâ quotidianâ patet, non nisi post manantem ex utero sanguinem, ad generationem aptam esse canem femellam æque ac mulierem, constat etiam periodum illam, in canibus pari stipari comitatu. Effluit redundans humor sanguineus, donec utero gerat, tum ut plurimum cessat effluvium, humorem superfluum matrique inutilem, in sui nutrimentum absumente fœtu; quia verò, in ipsis mulieribus, infinita periodum accelerant, totidem retardant, ità pariter, & in aliis animantium femellis. Hinc sicut quibusdam semel in bimestri, contingunt flores mulieribus, aliis bis in anno, absque sanitatis periculo, aliis nunquam; ità nonnullis canibus femellis semel; aliis bis in anno redit periodus. Aliis per decem, aliis per quindecim, aliis per viginti dies, verè sanguineus humor è pudendis inflatis erumpit; quæ semel tantùm in anno calent, per viginti dies; hoc fluxu perluuntur. Huic autem opinioni haud leve firmamentum vel pondus accedit, quòd in eam descendit celeberrimus auctor. (a)

Sed cur sæpius in anno, fluxum hunc non experiantur canes, præstantissimum viri supradicti tractatum (b) adeas. In promptu ratio est, Corporis

(a) D. Astruc.

(b) Traité des
mal. des Femmes.

magnitudo relativè minor; vitæ genus, exercitium majus, natura ad mærem vergens; hæc omnia in ipsis confirmantur mulieribus, quibus comperitur, menses penitus deficere, viraginibus herculei temperamenti, quæ cum ad robur masculinum accedant, & laboribus ut plurimum se exercent, alimentum omne facilè digerant, quod dici meritò potest, de canibus femellis, quæ nec vitæ genere, nec exercitio, nec fibrarum textu, nec partium compage, nec denique totius corporis temperie à maribus differunt. Quod de canibus femellis dictum est, in vaccis locum habet. Ruricolis enim omnibus notum est, his per quosdam dies humore quodam seroso, madescere genitalia, donec tandem ad sui cæstri summum pervenerint, se seque incredibili mansuetudine tegendas subjiciant; imò sicut dum lactantibus mulieribus lac deficit, cum menstrua fluunt, sic pariter certum est vaccas, dum æstuant, nullum, aut parum lactis suppeditare: quid igitur, aurigas, mangones, equorum amatores consulas, equas omnes, semel vel-bis in anno mucosum per genitalia madorem effundere ex constanti observatione jurabunt. Hic addendam censeo observationem, ab hujusce Academiæ Socio & Professore, (c) mihi traditam; cum enim in tempestate quâ cervi, cervas expetunt, Cervorum Cervarumque turmam herbâ jacentem vidisset, hanc accedendo in fugam expulit, & ad locum ab iis desertum cum venisset, herbam in quâ decumbentes cervas viderat, sanguine commaculatam non sine admiratione conspexit; cui observationi si confirmatio deesset, reperiri posset in vulgatâ venatorum dictione, cum canes, cervæ æstuantis vestigia ex sanguine pudendis effuso agnoscunt. (d)

(c) D. de la Sone.

(d) Ils Pont reconnu par ses rougeurs.

Si igitur rationi consentanea, observatione confirmata nullis objectionibus convelli possit hæc sententia, faceat, & à Medicorum Scholis prorsus explodatur vulgatissima opinio, & confidenter asseratur.

Ergò non ab uteri, ejusque vasorum perpendiculari situ, Menstrua Mulierum purgatio.

DOMINI DOCTORES DISPUTATURI.

M. Petrus Lalouette.

M. Josephus-Maria-Franciscus de la Sone, Censor Regius, Regiæ Scientiarum Academiæ Socius, & Chirurgiæ Gallico idiomate Professor.

M. Joannes-Claudius-Adrianus Helvetius, Regi à Sanctoribus Consiliis, Regiæ quæ Medicus Primarius & Regiæ Scientiarum Academiæ Socius,

M. Silvester Antonius le Moine.

M. Julianus Buffon.

M. Jacobus Benignus Winslow, Censor Regius, Regiæ Scientiarum Academiæ Regiæ quæ Societatis Londinensis Socius, Teutonice lingue Regius interpres, & in horto Regio anatomæ ac Chirurgiæ Professor.

M. Petrus-Josephus Macquer, Regiæ Scientiarum Academiæ Socius.

M. Petrus Bercher, Scholarum Professor & actus Præses.

M. Antonius Pepin, Regis Consiliarius & in Portu Brestensi Medicus Primarius.

Proponerat Parisiis JOANNES-FRANCISCUS-CLEMENS MORAND, Parisinus, è Regiâ Scientiarum Academiâ Madritensi, nec non Saluberrimæ Facultatis Medicinæ Parisiensis Baccalaureus A. R. S. H. 1749, à sextâ ad meridiem.